

IL SPORT TAI SECUI

I Zûcs olimpîcs, cjapitul di storie de civiltât

Ancje te nestre Piçule Patrie a son tancj i atlets che a àn partecipât, di Pirzio Biroli fin a Alessia Trost e lis fantatis di vuê



di GOTART MITRI

La passion pai esercizi fisics, l'interès pai spetacul agonistics, l'entusiasim par lis competizioni sportivis no son un fenomen tipic dome de nestre ete, ma a son un cjapitul sugjessif de storie de civiltât, tant che manifestazion di costum che come aspiet particolâr di une concezion de vite.

I Zûcs olimpîcs a cjatin, in cheste suaze, un puest impuartant. Inte celebrazion rituâl de antichitât a àn clamât dongje fulgnis di int par passe un mileni. Te ricercje simpri plui continue e spettacolâr dai limits des fuarcis umanis e tal perfezionament des pussibilitâts tecnichis e organizativis dal sport, i sports olimpîcs a àn marcât tancj progrès tal ultin secul.

Daûr de leinde, al fô Ercole (o Eracle), l'eroi des dodis fadiis e de fuarce straordenarie, a meti sù i zûcs. Si conte che al fondâ i zûcs dopo de setime fadie: dopo di vè netât lis stalis dal re Augie, che no i de ce che a jerin dacuardi, al fiscâ il teritori copant Augie cun ducj i siei fis. Par ringraziâ Zeus al convocà lis garis a Olimpie, che a parteciparin ancje Apol e Marte.

Dopo cualchi secul di dismentie, al fô Ifit, re di Elide, che al tornâ a meti in pîts la manifestazion e le clamâ Olimpiade. Daûr di cierts calcu e daûr di ce ch'al conte Pausânîe (storic e gjeograf dal II secul p.d.C.), si presume che al sedi stât il 776 p.d.C.

Si à di rivâ ai 5 di Avrîl dal 1896, cun che i zûcs a tornarin te storie par merit dal baron Pierre de Coubertin. *Quantum mutatum ab illo*. Ancje tai vieris zûcs si à praticât la coruzion, l'ingian e si à vût paiât i atlets. In di di vuê a son diventâts i zûcs mediatics, i zûcs dai sponsors, dai vincidôrs che, si si vuadagnin la medae olimpiche, ma an-



Adalt Alessia Trost e Andrea Magro (cun Valentina Vezzali); sot, Daniele Molmenti e Chiara Cainero, nestris protagoniscj ai Zûcs olimpîcs



cje un assegn cun cinc zeros par une vitorie.

Nus plasars pensâ al zûc, aegare viodude tant che moment ultin di une preparazion fisiche, mental e culturâl (si, ancje culturâl) intun confront cun altris, no cuntri altris. Nus plâs viodi chê bieles zoventût di dutis lis bandis dal mont cu lis lôr musis e la lôr piel ch'a son espressions mara-

veosis de diversitât, de bieles dal Creât. E nus torne tai voi l'imagin dal zovin gjamaican intant ch'al cor: une maravee, un quadri, una sinfonie, di une armonie e di une bieles che nus revochin une vite fisiocratiche, pensade ma magari cussind mai metude in vore, dai Illumiscj.

Nus plâs viodi i zûcs tant che un spetacul grandonon di che-

ste zoventût di dutis lis razis, di dutis lis religions, di dutis lis culturis. Jodi chei zovins biel ch'a saltin, ch'a corin, ch'a tirin, ch'a si pochin par butâ un balon in puarte. Viodiju cui lôr cjavei (bionts, tant che l'aur dal soreli ch'al va amont tes tieris scandinavis), cu lis lôr piels (cul colôr de tiere dai zovins andins, di une incontaminazion di salustri dal

mont), cui voi mandulâts dai asiatics ch'a pandin sorprese, maravee par sei li! Ce spetacul il mût culturâl di metisi te competizion: l'albasie, il zuiâ onest (*fair play*) dai nordics, la furbetât e l'ingian dai latins, la sudizion dai africans, la estemporanità e l'estetisim dai brasilians, la solarità e spontanità di zûc dai asiatics, la poltronarie dai balcanics.

Ma vignint a la Piçule Patrie, a son tancj i atlets furlans ch'a àn fat i Zûcs olimpîcs: si son fâts simpri onôr e i plui bras a àn vinçude ancje une medae. Al fô Alessandro Pirzio Biroli il prin, a Londre dal 1908, che al cjapà ancje la medae d'arint ta la siabule a scuadris. O podin ricuardâ achî i champions olimpîcs tal fobal di Berlin dal 1936 cun Alfredo Foni di Flambri e Annibale Frossi di Muzane; Virginio Pizzali, campion di inseguiment di ciclisim a scuadris tal 1956 a Melbourne. A Tokyo al jere stât medae d'arint Giorgio Ursi, di Gurize, tal inseguiment individuâl. Tal ciclisim, ancje Gino Pancino si veve cjapade la medae di bronç. Franco Bertoli, di Dedeà, al vincè ta la bale al svol la medae di bronç dal 1984 a Los Angeles.

Tai Zûcs di Atene dal 2004, Gianmarco Pozzocco, ta la bale tal zei, al veve vinçût la medae d'arint. No vin di dismenteâ il zei (miôr, la cosse) di medais puartadis a cjase ta lis Olimpiadis d'Unvier tal ski di font e la saghe da la famee Di Centa di Paluce (Manuela e so fradi Giorgio), di Gabriella Paruzzi di Tarvis e cui atlets Pietro Piller Cottrer e Silvio Fauner, dal Cjadvorî tai Zûcs olimpîcs d'Unvier. Si po calcolâ vincidôr di tantis medais ancje l'alendôr da la scuadre di scherne Andrea Magro. E je stade chê di un'altre fantate, Chiara Cainero, di Cjavalî tal skeet (tir al platut) la prime medae d'aur al feminil.

Tai Zûcs ultins, chei di Londre, Daniele Molmenti al à vinçût la medae d'aur ta la canoe K1. Ta lis Paraolimpiadis di Londre al à vint une medae di bronç Michele Pittacolo di Vil di Var, tal ciclisim. E cumò ch'a son in partence, trops furlans àno preparade la valis par Rio? O vin di di tropis, tratant ch'o vin dome fantatis: Alessia Trost di Pordenon tal salt in alt, Alice Miz-zau di Bean ta la nadazion e ancjemò Chiara Cainero tal tir al platut. Però o vin di zontâ ancje, par lis Paraolimpiadis, Gaia Rossi e Giuseppe Vella de scuadre di ping-pong di Borc San Roc di Udin. Fintremai tal ultin e veve sperât di jentrâ, come a Londre 2012 ancje la bravissime spadiste di Cjarlins Mara Navarra: coragio Mara, al sarà par la prossime volte.

CRIPRODUZIONE RISERVATA

TRADIZIONS IN CJARGNE

Cuant che "Ferragosto" al jere une fieste de Madone

La Sunte e je titolâr des plêfs di Guart, Oltri Bût e For Disore. Tantis graziis e indulgencis

di Celestino Vezzi

In di di voi il 15 di Avost al è par ducj, a la taliane, *ferragosto* ven a jessi une fieste civil, ma in diviers país da Cjargne a reste tantche fieste da Madone d'Avost mantignint la sô valence religjose.

Cheste date a riguarde la *Sunte*, ven a jessi che la Madone a è lade sù in cil cun dut il cuarp, un fat che dome tal 1950 al davenne dogme par opare di Pape Pio XII.

La *Sunte* a è titolâr da Pleif di Guart, da Pleif Oltri Bût e da gleise di Fors di Sôre e cundi-

plui a ven festegjate e puartade in pussision encje a Socleif, a Frassenet di Fors e Davuatri, a Cjaicas di Vergegnas, a Tamau di Paluce e a Çurçuvint.

In Guart la fieste a comence la vee cu la funsion e cui focs, ven a jessi las cidulas fatas cori suntun fil tindût dal giup, dulà che si cjate la gleise, fintremai tal puint da Mioça; da cualchi an i focs noi art plui, ma la fieste a è restade ben vive e a clame dongje encje i emigrants.

A Çurçuvint, par vecjo, a ere la Fraterne da Madone da Cinturie ch'a veve il compit di tindi e meti adum la fieste; la devo-

sion a Madone a va indaûr tai agns e già tal 1649 a risulste ative la "Arciconfraternita della Santissima Madonna di Consolazione, del padre Santo Agostino et madre Santa Monicha delli Centurati".

L'istituzion da Fraterne a puartave gracias, privilegios e indulgencias secont las diretivas dai Papas e di fat in particular pa fieste da Sunte si lei: "Giubileo Plenario perpetuo, come fosse l'Anno Santo, hanno gli Centurati il giorno di Pasqua di Ressurrezione, il giorno di Natale e il giorno dell'Assunta della Madonna, il quale gior-

no si celebrerà la solennità e Festa Principale, così come concessa da Sisto IV, Innocenzo VI e Clemente VII".

Tadi da fieste al ere marcjât e nol mancjave mai il bancjuto da Fraterne dulà che si vendevin las cinturias e las cjandelas benedetas e cundiplui al ere il moment bon par dâsi in note; il libri da Fraterne al ripuarte la liste di ducj i devots iscris e tocje di meti in lûs che no si trattave dome di Cirubits, ma encje dai país dongje e tal '700 si cjate ce tante int da l'Austrie e da Bavarie a dimostrazion che la nomée a veve varcât i confins pro-



Une procession pe Madone di Avost tai agns dal taramot

babilmenti in grazie dai Cramars.

Madone d'Avost a clamave dongje la int di dute la valade, ma a ere soredut la fieste dai emigrants che ai tornave par une dade in país e che noi po-

deve mancjâ as funsions, al gjespui e a pussision cu la statue da Madone.

Une fieste che, pur mudade tal timp, a reste vive inmò voi in tancj paisuts da noster Cjargne.

(varietât di Çurçuvint)